



孝經外傳

仁  
32



問仁  
卷 34

孝經外傳序

孝經一書秦火之後隸書今文

由於漢之顏氏凡十八章而鄭

玄為之註科斗古文武帝時得

於孔壁凡二十二章而孔安國

為之傳唐宋元明諸儒論古今

文紛紛不一嘗考一文之異詞



孝經外傳序

語少不同而意義初無遠者唯  
闡門章古文有焉今文無焉此  
其關係不輕唐開元勅議司馬  
貞淺學阿世妄黜闡門章卒致  
天寶之亂是故晦翁朱先生據  
古文刊其誤分定經傳闡門章  
特釋之竊謂小學所載經文其

擇最精熟讀之與大學經同一  
規模實聖人之微言也夫  
本朝之古孝靈御宇秦政贈經  
書譽田御宇百濟獻博士文武  
大寶之元始行釋奠之禮自來  
以易書詩禮孝經論語輪轉爲  
釋奠之講書風降俗衰釋奠之

禮廢輪轉之講熄而先秦之經  
無見于後世且鄭註孔傳于  
華夏尚矣元人志曰日本僧裔  
然以鄭註來今也二本流落人  
間但未知其真贗也抑晦翁八  
歲讀此書題八字曰若不如此  
便不成人嗚呼天性之感至矣

深矣由是觀之不讀此書者非  
人也讀而若晉安昌王階之蕪  
威則可謂不曾讀者惜乎此書  
非曾氏門人之舊是以晦翁僅  
爲刊誤而不及訓解欲別爲外  
傳而亦未成刊誤之後雖諸家  
多訓解恐未有發揮微言也爰

志予固陋表出小學所載而接  
取他書之言為外傳十章以述  
晦翁之意云

明曆二年八月朔日

後學山崎嘉序

孝經

孔子謂曾子曰身體髮膚受之父母  
不敢毀傷孝之始也立身行道  
揚名於後世以顯父母孝之終也  
夫孝始於事親中於事君終於立  
身愛親者不敢惡於人敬親者不  
敢慢於人愛敬盡於事親而德教

加於百姓刑於四海此天子之孝也  
也在上不驕高而不危制節謹度  
滿而不溢然後能保其社稷而和  
其民人此諸侯之孝也非先王之  
法服不敢服非先王之法言不敢  
道非先王之德行不敢行然後能  
保其宗廟此卿大夫之孝也以孝

事君則忠以敬事長則順忠順不  
失以事其上然後能守其祭祀此  
士之孝也用天之道因地之利謹  
身節用以養父母此庶人之孝也  
故自天子至於庶人孝無終始而  
患不及者未之有也

右經一章

凡二百四十一  
十一字

孝經外傳

子曰君子無不敬也敬身為大身也者親之枝也敢不敬與不能敬其身是傷其親傷其親是傷其本傷其本枝從而亡

孟子曰事孰為大事親為大守孰為大守身為大不失其身而能事

其親者吾聞之矣失其身而能事其親者吾未之聞也孰不為事事親事之本也孰不為守守身守之本也

禮記曰孝子之有深愛者必有和氣有和氣者必有愉色有愉色者必有婉容孝子如執玉如奉盈洞

洞屬屬然如弗勝如將失之嚴威  
儼恪非所以事親也

曲禮曰凡爲人子之禮冬溫而夏  
清昏定而晨省出必告反必面所  
遊必有常所習必有業恒言不稱  
老聽於無聲視於無形不登高不  
臨深不苟訾不苟笑孝子不服闇

不登危懼辱親也

內則曰父母有過下氣怡色柔聲  
以諫諫若不入起敬起孝說則復  
諫不說與其得罪於鄉黨州閭寧  
孰諫父母怒不說而撻之流血不  
敢疾怨起敬起孝  
曲禮曰子之事親也三諫而不聽



則號泣而隨之

禮記曰父命呼唯而不諾手執業則投之食在口則吐之走而不趨親老由不易方復不過時親瘠色容不盛此孝子之疏節也父沒而不能讀父之書手澤存焉爾母沒而杯圈不能飲焉口澤之氣存焉

爾

子曰孝子之喪親哭不偯禮無容言不支服美不安聞樂不樂食旨不甘此哀戚之情三日而食教民無以死傷生毀不滅性此聖人之政喪不過三年示民有終爲之棺槨衣衾而舉之陳其簠簋而哀戚

性者未發之中也情發中節之和也  
性者天理無虧也仁義禮智謂之性  
喜怒哀懼  
謂之情

仁者即性之理愛者即情之發

愛

仁用

情則由於性而出性則由於情而行其理則一而已

私欲克去處天理自流通

萬殊一本者治世四種動靜學正心無不穩字

觀其會通以行其典禮會謂理之所聚而不可遺處  
通謂理之可行而無所礙處

之擗踊哭泣哀以送之ト其宅兆而安措之爲之宗廟以鬼享之春秋祭祀以時思之生事愛敬死事哀戚生民之本盡矣死生之義備矣孝子之事親終矣

子思曰喪三日而殯凡附於身者必誠必信勿之有悔焉耳矣三月

而葬凡附於棺者必誠必信勿之有悔焉耳矣喪三年以爲極亡則弗之忘矣故君子有終身之憂而無一朝之患故息日不樂

祭義曰霜露既降君子履之必有悽愴之心非其寒之謂也春雨露既濡君子履之必有怵惕之心如

將見之

祭統曰夫祭也者必夫婦親之所  
以備外內之官也官備則具備君  
子之祭也必身親莅之有故則使  
人可也

祭義曰致齊於內散齊於外齊之  
日思其所居處思其笑語思其志意

思其所樂思其所嗜齊三日乃見  
其所為齊者祭之日入室僂然必  
有見乎其位周還出戶肅然必有  
聞乎其容聲出戶而聽愾然必有  
聞乎其歎息之聲是故先王之孝  
也色不忘乎目聲不絕乎耳心志  
嗜欲不忘乎心致愛則存致敬則

著著存不忘乎心夫安得不敬乎

右傳之首章凡十節釋孝之始

曾子曰身也者父母之遺體也行  
父母之遺體敢不敬乎居處不莊  
非孝也事君不忠非孝也莅官不  
敬非孝也朋友不信非孝也戰陳  
無勇非孝也五者不遂戒及於親

敢不敬乎

子曰君子事君進思盡忠退思補  
過將順其美匡救其惡故上下能  
相親

孟子曰有事君人者事是君則為  
容悅者也有安社稷臣者以安社  
稷為悅者也有天民者達可行於

天下而後行之者也有大人者正  
已而物正者也

曲禮曰爲人臣之禮不顯諫三諫  
而不聽則逃之

禮記曰事親有隱而無犯左右就  
養無方服勤至死致喪三年事君  
有犯而無隱左右就養有方服勤

至死方喪三年事師無犯無隱左  
右就養無方服勤至死心喪三年

右傳之二章凡五節釋孝之中

曾子有疾召門弟子曰啓予足啓  
予手詩云戰戰兢兢如臨深淵如  
履薄冰而今而後吾知兇夫小子  
樂正子春下堂而傷其足數月不

出猶有憂色門弟子曰夫子之足  
瘠矣數月不出猶有憂色何也樂  
正子春曰善如爾之問也善如爾  
之問也吾聞諸曾子曾子聞諸夫  
子曰天之所生地之所養惟人爲  
大父母全而生之子全而歸之可  
謂孝矣不虧其體不辱其身可謂

全矣故君子頃步而不敢忘孝也  
今予忘孝之道予是以有憂色也  
一舉足而不敢忘父母是故道而  
不徑舟而不游不敢以先父母之  
遺體行殆壹出言而不敢忘父母  
是故惡言不出於口忿言不反於  
身不辱其身不羞其親可謂孝矣

右傳之三章

凡二節

釋孝之終

堯典曰克明俊德以親九族九族既睦平章百姓百姓昭明協和萬邦黎民於變時雍帝曰咨四岳朕在位七十載汝能庸命巽朕位岳曰否德忝帝位曰明明揚側陋師錫帝曰有鰥在下曰虞舜帝曰兪

予聞如何岳曰瞽子父頑母嚚象傲克諧以孝烝烝乂不格姦帝曰我其試哉女于時觀厥刑于二女釐降二女于嬀汭嬪于虞帝曰欽哉

孟子曰不得乎親不可以為人不能順乎親不可以為子舜盡事親之



道而瞽瞍底豫瞽瞍底豫而天下  
化瞽瞍底豫而天下之爲父子者  
定此之謂大孝

子曰禹吾無間然矣菲飲食而致  
孝乎鬼神惡衣服而致美乎黻冕  
卑宮室而盡力乎溝洫禹吾無間  
然矣

伊訓曰惟我商王布昭聖武代虐  
以寬兆民允懷今王嗣厥德罔不  
在初立愛惟親立敬惟長始于家  
邦終于四海

文王之爲世子朝於王季日三雞  
初鳴而衣服至於寢門外問內豎  
之御者曰今日安否何如內豎曰

安文王乃喜及日中又至亦如之  
及莫又至亦如之其有不安節則  
內豎以告文王文王色憂行不能  
正履王季復膳然後亦復初食上  
必在視寒暖之節食下問所膳命  
膳宰曰未有原應曰諾然後退武  
王帥而行之文王有疾武王不說

冠帶而養文王一飯亦一飯文王  
再飯亦再飯

子曰武王周公其達孝矣乎夫孝  
者善繼人之志善述人之事者也  
踐其位行其禮奏其樂敬其所尊  
愛其所親事死如事生事亡如事  
存孝之至也

子曰昔者明王事父孝故事天  
明事母孝故事地察長幼順故  
上下治天地明察神明彰矣故  
雖天子必有尊也言有父也必  
有先也言有兄也宗廟致敬不  
忘親也修身慎行恐辱先也宗  
廟致敬鬼神著矣孝悌之至通  
於神明光于四海

無所不通

子曰昔者明王之以孝治天下也  
不敢遺小國之臣而況於公侯伯  
子男乎故得萬國之歡心以事其  
先王治國者不敢侮於鰥寡而況  
於士民乎故得百姓之歡心以事  
其先君治家者不敢失於臣妾而

况於妻子乎故得人之權心以事  
其親夫然故生則親安之祭則鬼  
享之是以天下和平災害不生禍  
亂不作故明王之以孝治天下如  
此

子曰夫孝天之經地之義民之行  
天地之經而民是則之則天之明  
因地之義以順天下是以其教不  
肅而成其政不嚴而治

子曰閨門之內具禮矣乎嚴父嚴  
兄妻子臣妾猶百姓徒役也

父孝也嚴兄弟也  
妻子臣妾官也

孟子曰老吾老以及人之老幼吾  
幼以及人之幼天下可運於掌詩

云刑于寡妻至于兄弟以御于家  
邦言舉斯心加諸彼而已故推恩  
足以保四海不推恩無以保妻子  
孟子曰人之所不學而能者其良  
能也所不慮而知者其良知也孩  
提之童無不知愛其親也及其長  
也無不知敬其兄也親親仁也敬

長義也無他達之天下也

孟子曰道在爾而求諸遠事在易  
而求諸難人人親其親長其長而  
天下平

右傳之四章凡十節釋天子之

孝

孟子曰所謂西伯善養老者制其

田里教之樹畜導其妻子使養其  
老五十非帛不煖七十非肉不飽  
不煖不飽謂之凍餒文王之民無  
凍餒之老者此之謂也

右傳之五章釋諸侯之孝

曾子曰吾聞諸夫子孟莊子之孝  
也其他可能也其不改父之臣與

父之政是難能也

孟懿子問孝子曰無違樊遲御子  
告之曰孟孫問孝於我我對曰無  
違樊遲曰何謂也子曰生事之以  
禮死葬之以禮祭之以禮

右傳之六章

凡二十一節

釋卿大夫

之孝

子曰君子之事親孝故忠可移於君事兄悌故順可移於長居家理故治可移於官是故行成於內而名立於後世矣

右傳之七章釋士之孝

詩云夙興夜寐無忝爾所生

詩云父兮生我母兮鞠我拊我畜

我長我育我顧我復我出入腹我欲報之德昊天罔極

子曰父母之年不可不知也一則以喜一則以懼

曾子曰親戚不說不敢外交近者不親不敢求遠小者不審不敢言大故人之生也百歲之中有疾病

焉有老幼焉故君子思其不可復  
者而先施焉親戚既沒雖欲孝誰  
爲孝年旣耆艾雖欲悌誰爲悌故  
孝有不及悌有不時其此之謂歟  
官怠於宦成病加於少愈禍生於  
懈惰孝衰於妻子察此四者慎終  
如始詩曰靡不有初鮮克有終

子游問孝子曰今之孝者是謂能  
養至於犬馬皆能有養不敬何以  
別乎

子夏問孝子曰色難有事弟子服  
其勞有酒食先生饌曾是以爲孝  
乎

孟武伯問孝子曰父母惟其疾之



憂

曾子曰孝子之養老也樂其心不  
違其志樂其耳目安其寢處以其  
飲食思養之是故父母之所愛亦  
愛之父母之所敬亦敬之至於犬  
馬盡然而況於人乎

子曰孝哉閔子騫人不聞於其父

母昆弟之言

孟子曰曾子養曾皙必有酒肉將  
徹必請所與問有餘必曰有曾皙  
死曾元養曾子必有酒肉將徹不  
請所與問有餘曰云矣將以復進  
也此所謂養口體者也若曾子則  
可謂養志也事親若曾子者可也

曾子曰孝有三大孝尊親其次弗辱其下能養公明儀問於曾子曰夫子可以爲孝乎曾子曰是何言與是何言與君子之所謂孝者先意承志諭父母於道參直養者也安能爲孝乎

子曰孝子之事親居則致其敬養

則致其樂病則致其憂喪則致其哀祭則致其嚴五者備矣然後能事親事親者居上不驕爲下不亂在醜不爭居上而驕則亡爲下而亂則刑在醜而爭則兵此三者不除雖日用三牲之養猶爲不孝也孟子曰世俗所謂不孝者五惰其

四支不顧父母之養一不孝也博  
奕好飲酒不顧父母之養二不孝  
也好貨財私妻子不顧父母之養  
三不孝也從耳目之欲以爲父母  
戮四不孝也好勇鬪狠以危父母  
五不孝也

右傳之八章

凡十  
三節

釋庶人之

孝

子曰五刑之屬三千而罪莫大於  
不孝要君者無上非聖人者無法  
非孝者無親此大亂之道也

右傳之九章因上章不孝之  
云而垂戒矣

子曰天子有爭臣七人雖無道不

失其天下諸侯有爭臣五人雖無  
道不失其國大夫有爭臣三人雖  
無道不失其家士有爭友則身不  
離於令名父有爭子則身不陷於  
不義故當不義則子不可以弗爭  
於父臣不可以弗爭於君  
右傳之十章不釋經而別發

一義

孝經外傳終

卷之八  
明曆二  
年  
南  
昌  
吉  
辰  
書  
肆  
武  
村  
市  
兵  
衛  
刊  
行

明曆二  
年  
南  
昌  
吉  
辰  
書  
肆  
武  
村  
市  
兵  
衛  
刊  
行

二  
條  
通  
松  
屋  
所

明  
曆  
二  
年  
南  
昌  
吉  
辰  
書  
肆  
武  
村  
市  
兵  
衛  
刊  
行

二  
條  
通  
松  
屋  
所

